

Inuussutissarsiutiginagu aalisarsinnaaneq piniarsinnaanerlu aatsaat ukiut pingasut Kalaallit Nunaanni najugaqareersimagaaanni pisinnaatitaaffinngornissaa siunertaralugu Naalakkersuisut UKA14-mut Aalisarneq pillugu inatsisartut inatsisaat nr. 18, 31. oktober 1996-imeersup kiisalu Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersup allanngortinnissaannut siunnersuusioqqullugit peqquneqarnissaannik Inatsisartut aalajangiiffigisassaattut siunnersuut
(Saqq.: Inatsisartunut ilaasortaq Lars Mathæussen, Siumut)

pillugu

Aalisarnermut Piniarnermut Nunalerinermullu ataatsimiititaliap

ISUMALIUTISSIISSUTAA

Siunnersuutip aappaassaaneerreqarnerani saqqummiunneqartoq.

Ataatsimiititaliami suliaqarnermi ilaasortat uku peqataapput:

Inatsisartunut ilaasortaq Nikolaj Jeremiassen, Siumut, siulittaasoq
Inatsisartunut ilaasortaq Karl-Kristian Kruse, Siumut, siulittaasup tullia
Inatsisartunut ilaasortaq Saxtorph Didriksen, Siumut
Inatsisartunut ilaasortaq Knud Kristiansen, Atassut
Inatsisartunut ilaasortaq Aqqaluaq B. Egede, Inuit Ataqtigiit
Inatsisartunut ilaasortaq Ane Hansen, Inuit Ataqtigiit
Inatsisartunut ilaasortaq Hans Enoksen, Partii Naleraq

UPA 2014-imi ull. 29. april 2014 siullermeerereermermi siunnersuut Ataatsimiititaliap misissorpaa.

Siunnersuutip imaa aamma siunertaa

Siunnersuutip uuma siunertaraa aalisarnermut, piniarnermut aallaaniarnermullu inatsisinut allannguutissamik siunnersuutini UKA 2014-imut Naalakkersuisut saqqummiusseqquneqassasut, taamaalillutik inuit Kalaallit Nunaannut suliaqartortut sunngiffimmi aalisarnermik, piniarnermik aallaaniarnermillu ingerlatsinissamut siunissami aatsaat ukiut pingasut Kalaallit Nunaanni najugaqareersimagunik akuersissummik pissarsisinnaalissallutik.

Siunnersuummut ilaatigut tunngavilersuutigineqarput uumassusilinnik piujuartitsineq tunngavigalugu atuinissaq kiisalu sillimaniarnermut isiginiagassat, aamma inuit Kalaallit Nunaannut suliarlorlutik nuuttartut pinngortitami qanoq iliornissaminnut ilinniartariaqarnerat.

Siunnersuutip Inatsisartuni siullermeerneqarnera

Siunnersuut itigartinneqassasoq amerlanerussuteqarluartut inassutigaat, peqatigitilluguli siunnersuut Ataatsimiititaliamit annertunerusumik naliligassanngorlugu innersuunneqarnissaa pissutissaqartinneqarluni.

Ataatsimiititaliap siunnersuummik suliaqarnera

Ataatsimiititaliap isumaa malillugu pinngortitamik atuineq uumassuseqarnermut illersorsinnaasumik aamma isumalluutit piffissami sivilunerusumi piujuartinneqarsinnaanerannik qularutissartaqangitsumik ingerlanneqarsinnaasariaqarnerat Ataatsimiititaliap aallaqqaasiullugu oqaatigerusuppaa.

Peqatigitillugu Ataatsimiititaliaq isumaqarpoq, inuit pinngortitami angalasartut imminnut allanillu uloriarnartorsiortitsinatik angalasinnaasariaqarnerat. Tamatuma malitsigisaanik aalisartut piniartut aallaaniartartullu piffissaatillugu peqqissaartumik ingerlatsisariaqarput, tassungalu atatillugu peqqissaartumik illersorsinnaasumilu sakkunik passusissinnaasariaqarlutik, taamaalillutik uumasut pissatat ikinnerpaatinniarneqarsinnaassammata.

Ataatsimiititaliap maluginiarpaa, inatsiseqarnermi atuuttumi taassumalu nalunaarutitaanni killissarititaasutigut pinngortitami piujuartitsineq illersussallugu, tassungalu atatillugu uumasooqatigiit ataasiakkaat illersussallugit, periarfissaqarluartoq Aalisarnermut, Piniarnermut Nunalerinermullu Naalakkersuisoq naliliisoq. Taamatut naliliineq Ataatsimiititaliap imaaliallaannaq assortussallugu pissutissaqartinngilaa.

Taamaattorli Ataatsimiititaliap taarusuppaa, sunngiffimmi aalisarnermut, piniarnermut aallaaniarnermullu periarfissaqarnermut atatillugu Aalisarnermut, Piniarnermut Nunalerinermullu Naalakkersuisup akissummini inatsimmik paasinninnera Ataatsimiititaliap isumaqatiginngimmagu.

Tassunga atatillugu Ataatsimiititaliap paasinninnera malillugu inatsimmi danskit nunamilu allami innuttaassusillit immikkoortinneqarput, aamma uumasunut killersukkanik killilersugaanngitsunillu piniarnermut aallaaniartarnermullu atatillugu. Maanna aalajangiiffigisassatut siunnersuummut atatillugu immikkoortitsineq pingaaruteqanngitsuunngilaaq, taamaattumillu Aalisarnermut, Piniarnermut Nunalerinermullu Naalakkersuisumit akissummi immikkoortitsineq akissuteqaammi taanngimmagu Ataatsimiititaliap pitsaanngitsutut isiga.

Tamanna pissutigalugu Ataatsimiititaliap tulluartippaa – aamma siunissami Inatsisartuni isumaqatigiinniartarnerit eqqarsaatigalugit – inatsimmi pineqartumi oqaasertat tamaasa issuassallugit:

Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersoq

§ 4, *imm.* 3. Sunngiffimmi piniarnissamut aamma sunngiffimmi aallaaniarnissamut akuersissut tunniunneqarsinnaavoq danskisut innuttaassusillinnut aamma nunani allani innuttaassusillit Kalaallit Nunaanni inuit nalunaarsorsimaffiannut nalunaarneqarsimasut.

§ 4, *imm.* 4. Naalakkersuisut *imm.* 2, nr. 2 - 4-mi aamma *imm.* 3-imi aalajangersakkat immikkut akuersissuteqarfigninnaavaat, qinnuteqartup Kalaallit Nunaannut attuumassuteqarnera aallaavigalugu tamanna naapertuuttut isigineqarpat, qinnuteqartorlu ilinniarnermik assigisaanilluunniit pissuteqartumik Kalaallit Nunaata avataaniikkallarsimappat.

§ 5. Sunngiffimmi piniarnermut aallaaniarnermullu akuersissutit piniakkanut killilersukkanut inunnut Kalaallit Nunaanni najugalittut inuit nalunaarsorsimaffiannut nalunaarneqarsimasunut qinnuteqarnikkut tunniunneqarsinnaapput, qinnuteqarfissaq sioqqullugu Kalaallit Nunaanni najugalittut ukiuni qaangiuttuni marlunni nalunaarsorneqareersimasunut.

§ 5, *imm.* 2. *Imm.* 1-mi aalajangersagaq apeqquaatinnagu piniakkanik killilersugaasunik sunngiffimmi piniarnissamut aallaaniarnissamullu akuersissutit qinnuteqaateqartoqarneratigut tunniunneqarsinnaapput inunnut,

- 1) Kalaallit Nunaanni inuit nalunaarsorsimaffiannut nalunaarsimasunut aamma
- 2) ukiuni kingullerni qulini piffissaq qinnuteqarfik sioqqullugu ukiuni marlunni ataannartumik Kalaallit Nunaanni najugalittut inuit nalunaarsorsimaffianni nalunaarsorsimasunut.

Aalisarneq pillugu inatsisartut inatsisaat nr. 18, 31. oktober 1996-imeersoq

§ 8. Inuit danskisut innuttaassusillit Kalaallit Nunaanni aalajangersimasumik angerlarsimaffillit imartani Kalaallit Nunaata aalisarnikkut oqartussaaffigisaani inuussutissarsiutiginagu aalisarsinnaapput. Nunani allani Danmarkinngitsumi innuttaassusillit Kalaallit Nunaanni najugaqavissut ukiullu kingulliit marluk ataavartumik Kalaallit Nunaanniissimasut danskisut innuttaassuseqartut pineqassapput.

§ 8 *imm.* 2. Aalisakkat aalajangersimasut inuussutissarsiutiginagu aalisarfiginissaannut immikkut akuersissuteqarfigneqarnissap piumasqaataanerani Naalakkersuisut malittarisassiorsinnaapput.

§ 8, *Imm.* 3. Inuit *imm.* 1-imi ilaatinneqanngitsut inuussutissarsiutiginagu aalisassagunik immikkut akuersissuteqarfigneqassapput.

Qulaani pineqartoq innersuussutigalugu Ataatsimiititaliaq isumaqarpoq, sunngiffimmi piniarsinnaanermut aallaaniarsinnaanermullu aamma Kalaallit Nunaanni inuussutissarsiutiginagu aalisarnermut malittarisassat malunnaatilimmik sukaternissaannut siunnersuut una pissutissaqartitsilissasoq. Tassungaa atatillugu Ataatsimiititaliap ilaatigut maluginiarppaa, danskisut innuttaassusillit – tunngaviusumik – inatsiseqarnek atuuttoq naapertorlugi maanna inuussutissarsiutiginagu aalisarnissamut, kiisalu uumasunik killilersugaanngitsunik piniarnissamut aallaaniarnissamullu killiliiffigineqaratik periarfissaqartut.

Tassunga atatillugu Ataatsimiititaliap maluginiarpaa, aalajangiiffigisassatut siunnersuummut iluaqutissanik uppersaatitnik siunnersuuteqartoq saqqummiussaqaanngitsoq, taamaattumillu inatsisip allanngortinnissaanik pisariaqartitsinermut Ataatsimiititaliaq isummernissamut soorunami ajornakusoortitsisoq. Taamaalilluni ersarissumik takuneqarsinnaanngilaq, inatsimmut allannguutissatut siunnersuut qanoq timalernejassanersoq, kiisalu malittarisassat allanngortinnerisigut qassit attugaassanersut. Siunnersuummi ilaatigut nassuiarneqanngilaq, kalaallit nunami allami najugaqareerlutik uternerminni inatsimmik allannguinermut atatillugu qanoq inissisimajumaassanersut. Peqatigisaanik sunngiffimmi aalisartartut, piniartartut aallaaniartartullu pinngortitamut immikkut ulorianaataasarnerat uppersarneqanngilaq, kiisalu inatsisini nalunaarutinilu atuuttuni killissarititaasut iluanni pinngortitami piujuartitsinerup illersorneqarnissaanik siunnersuutip siunertaata piviusunngortinneqarsinnaannginnera uppersarneqarsinnaanngitsoq.


Taamaattumik ajornartorsiutip annertussusia suuneralu misissoqqissaartinnagit aamma allanngueratarnermi sunngiffimmi aalisartartut, piniartartut aallaaniartartullu kalaallit qanoq amerlatigisut ilaatinneqassanersut misissoqqissaartinnagu inatsisip allanngortinnissaanik aalajangiinissaq Ataatsimiititaliap kaammattuutigisinnaanngilaa. Ataatsimiititaliaaqaq kaammattuutigissavaa, misissuinermut atatillugu nunani allani malittarisassat assingusut pillugit paasissutissat pissarsiariniarneqassasut, taamaalilluni Inatsisartuni aalajangiiniarnermi sanilliussisinnaaneq tunngavissaqalersinnaassammat. Tassunga atatillugu aallaaniarsinnaanermut misilitsinneq pillugu malittarisassanik aqutsinermillu nunat tamalaat misilittagaat aamma akissaaajaatit tassunga tunngassuteqartut misissuinermi iluaqutaasumik ilanngunneqarsinnaapput.


Naggasiullugu Ataatsimiititaliap oqaatigissavaa, tamatumunnga pingaarutilinnik suliamullu tunngasunik tunngavilersuisoqarsinnaanngippat inuiaqatigiinni innuttaasut aqqissuussamik inatsisitigut assigiinngitsumik pineqarnissaasa atuutilersinneqarnissaa Ataatsimiititaliap ataatsimut isigalugu eqqarsarnartoqartimmagu. Tamatumani naligiissitaanermut tunngaviusoq, kiisalu inuit aalajangersimasut mattunneqarnerannik oqariartuuteqarsinnaanerp qanoq paasineqarsinnaanera Ataatsimiititaliap innersuussutigissavaa. Taamaalilluni inuit sulinerikkut akileraarnermikkullu inuiaqatigiinnut aamma ilapittuutaasut kalaallit piorsarsimaneranni pingaaruteqarluinnartumut peqataasinnaannginnerat inuiaqatigiinni ataatsimut isigalugu iluaqutaassanersoq Ataatsimiititaliap qularutigaa.


Ataatsimiititaliap inassutai


Siunnersuut **itigartinneqassasoq** ataatsimiititaliap isumaqatigiittup **inassutigaa**.


Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.



Nikolaj Jeremiassen,
Siulittaasoq



Karl-Kristian Kruse,
Siulittaasup tullia


Saxtorph Didriksen


Ane Hansen


Hans Enoksen


Knud Kristiansen


Aqqaluq B. Egede